

Na osnovu člana 161., tačka 11. Zakona o zaštiti od požara i vatrogastva ("Službene novine Federacije BiH", broj 64/09), federalni ministar energije, rudarstva i industrije donosi

**PRAVILNIK
O USLOVIMA ZA ISPITIVANJE UVEZENIH UREĐAJA
ZA DOJAVU I GAŠENJE POŽARA**

(„Službene novine Federacije BiH“, br. 112/12)

I. OPĆE ODREDBE

Član 1.

Pravilnikom se propisuju tehnički i drugi uslovi koje mora ispunjavati pravno lice ovlašteno za ispitivanje ispravnosti uvezenih uređaja, opreme, sredstava i instalacija namijenjenih za gašenje, dojavu i sprečavanje širenja požara te njihove podobnosti za namijenjenu svrhu (u daljem tekstu: ovlašteno pravno lice) kao i stručna sprema radnika koji će vršiti takvo ispitivanje.

Uređajima se u smislu pravilnika smatraju uvezeni uređaji, oprema, sredstva i instalacije za sprečavanje, dojavu i gašenje požara.

Član 2.

Ovlašteno pravno lice mora imati tehničku opremu i sredstva takvih karakteristika da se njome mogu obaviti poslovi ispitivanja uređaja u skladu sa referentnim BAS standardima. Za poslove iz stava 1. ovog člana za koje nisu doneseni referentni BAS standardi mogu se uz evropske norme i usklađene evropske norme primjenjivati i druge strane norme u skladu sa Zakonom o standardizaciji Bosne i Hercegovine ("Službeni list BiH", broj 19/01), kao i strana tehnička praksa, ukoliko isti nisu u suprotnosti sa zahtjevima evropskih normi, odnosno zahtjevima usklađenog zakonodavstva Evropske zajednice.

Član 3.

Ovlašteno pravno lice mora biti upisano u sudski registar i mora imati odgovarajuće laboratorijske, skladišne i kancelarijske prostore da u njima može organizovati obavljanje poslova ispitivanja uređaja.

Ovlašteno pravno lice mora biti neovisno i ne smije biti upravljano od strane proizvođača ili dobavljača.

Član 4.

Ovlašteno pravno lice mora u stalnom radnom odnosu imati najmanje:

- jednog radnika mašinske struke, VII stepena obrazovanja ili drugi ciklus visokog obrazovanja prema Bolonjskom procesu, s tri godine radnog iskustva u struci ili jednog radnika mašinske struke, VI stepena obrazovanja ili prvi ciklus visokog obrazovanja po Bolonjskom procesu s pet godina radnog iskustva u struci,
- jednog radnika hemijske struke, VII stepena obrazovanja ili drugi ciklus visokog obrazovanja prema Bolonjskom procesu, s tri godine radnog iskustva u struci ili jednog radnika hemijske struke, VI stepena obrazovanja ili prvi ciklus visokog obrazovanja po Bolonjskom procesu s pet godina radnog iskustva u struci,
- jednog radnika elektrotehničke struke, VII stepena obrazovanja ili drugi ciklus visokog obrazovanja prema Bolonjskom procesu, s tri godine radnog iskustva u struci ili jednog radnika elektrotehničke struke, VI stepena obrazovanja ili prvi ciklus visokog obrazovanja po Bolonjskom procesu s pet godina radnog iskustva u struci.

Član 5.

Radnici kod ovlaštenih pravnih lica koji su zaduženi za poslove ispitivanja, moraju poznavati i moći samostalno provesti postupak ispitivanja ispravnosti i podobnosti proizvoda.

Član 6.

Zahtjev za dobivanje ovlaštenja za obavljanje poslova ispitivanja uređaja se podnosi Federalnom ministarstvu energije, rudarstva i industrije (u daljem tekstu: Ministarstvo) i mora sadržavati:

- naziv pravnog lica koje podnosi zahtjev;

- popis uređaja i opreme prema vrstama koja je neophodna za ispitivanje i koju pravno lice posjeduje;
 - podatke o raspoloživom laboratorijskom, skladišnom i kancelarijskom prostoru;
 - broj i stručnu spremu radnika predviđenih za obavljanje ispitivanja za koje se traži odobrenje;
 - popis i opis postupaka koje će pravno lice primjenjivati pri obavljanju poslova ispitivanja uređaja;
 - dokaz o podmirenim troškovima postupka izdavanja odobrenja.
- Troškove postupka iz stava 2. alineja 6. ovog člana određuje rješenjem federalni ministar energije, rudarstva i industrije.

Član 7.

Federalni ministar energije, rudarstva i industrije imenuje komisiju koja po zahtjevu iz člana 6. pravilnika utvrđuje postojanje uslova za izdavanje odobrenja za pravno lice ovlašteno za ocjenu ispravnosti i podobnosti proizvoda za zaštitu od požara.

Komisija se sastoji od 5 članova, od kojih su dva člana iz reda eksperata, dva iz reda državnih službenika koji rade u Ministarstvu i jednog člana koji je radnik Zavoda za mjeriteljstvo Federacije Bosne i Hercegovine.

Član 8.

Članovi komisije iz prethodnog člana imaju pravo na naknadu za rad u komisiji. Naknade iz stava 1. ovog člana finansiraju se iz sredstava predviđenih za pokrivanje troškova postupka izdavanja ovlaštenja za obavljanje poslova ispitivanja uređaja propisanih članom 6. stav 2. alineja 6. ovog pravilnika.

II. ISPITIVANJE

Član 9.

Ovlašteno pravno lice je obavezno o početku ispitivanja informisati Ministarstvo.

Komisija iz člana 7. pravilnika može biti prisutna ispitivanju uređaja te obavljati nadzor nad svim poslovima u vezi sa ispitivanjem uređaja.

Član 10.

Ovlašteno pravno lice obavezno podnosi Ministarstvu zapisnik sa rezultatima ispitivanja uređaja.

Član 11.

Zapisnik o rezultatima ispitivanja uređaja mora sadržavati:

- naziv i tipsku oznaku proizvoda;
- naziv proizvođača;
- naziv uvoznika i naručitelja ispitivanja;
- popis tehničke dokumentacije proizvoda;
- obilježja i deklarisanu namjenu proizvoda;
- podatke o normi (Propisu) prema kojem je ispitivanje izvršeno;
- rezultate provjere i ispitivanja sa zaključkom.

Član 12.

Ovlašteno pravno lice, nakon obavljenog ispitivanja, ovlašteno je za izdavanje isprave o ispravnosti uređaja, kao i njegove podobnosti za namijenjenu svrhu (u daljnjem tekstu: isprava o ispravnosti uređaja).

Ocjena ispravnosti proizvoda za zaštitu od požara se provodi u postupku ocjenjivanja usklađenosti proizvoda i uključuje dokazivanje upotrebljivosti proizvoda za zaštitu od požara u mjeri potrebnoj za ispunjavanje bitnih zahtjeva za zaštitu od požara, kao dio uslova za njihovo stavljanje na tržište, distribuciju i upotrebu.

U vezi sa uslovima za stavljanje na tržište i distribuciju proizvoda, osim uslova pravilnika, primjenjuju se i odredbe posebnih zakona i propisa kojim se uređuje opća sigurnost proizvoda i opći tehnički zahtjevi za proizvode.

Ovlašteno pravno lice ne može obavljati ispitivanje uređaja i izdavati isprave o ispravnosti uređaja za one uređaje koje samo uvozi.

Ministarstvo će povući ovlaštenje pravnom licu ako se utvrdi da ono više ne udovoljava kriterijima navedenim u čl. 2., 3. i 4. kao i drugim uslovima pravilnika.

Član 13.

Ovlašteno pravno lice Ministarstvu obavezno podnosi izvještaj o izdavanju ili neizdavanju isprave o ispravnosti uređaja sa zapisnikom o rezultatima ispitivanja uređaja.

Ministarstvo vodi popis o ovlaštenim pravnim licima i izdanim ispravama o ispravnosti uređaja.

Popis ovlaštenih pravnih lica i popis proizvoda koji posjeduju važeću ispravu o ispravnosti proizvoda za zaštitu od požara javno se objavljuje na službenim web stranicama Ministarstva.

Član 14.

Cijenu ispitivanja uređaja i izdavanja isprave o ispravnosti uređaja određuje ovlašteno pravno lice uz saglasnost Ministarstva.

III. ZAVRŠNE ODREDBE

Član 15.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

